

*Potestas Ecclesiae in Censuris est  
de jure divino.*

**O**Mnia ut exploret trutinétq; Ecclesia, praestat  
Huic *Magna Charta*, *Pagina Sacra* vicem;  
Exornare tuam pergas Ecclesia Spartam,  
Cum datur à Summo, *Litera*, Rege, *Patens*.  
Nulla tua innocuas vexat *Censura* Columbas,  
Exagitat Corvos iustior illa malos.  
Si quis vicini violarit foedera lecti,  
Exemplum nè sit, scilicet ipsa facis;  
Cogitur hinc tunicam *Machius* gestare molestam,  
Dum referunt læsum *lintea nuda* torum;  
Quadrat, Adulterii poenas infligere, mystæ,  
Qui jaciatur lapidem quis pietate prior?  
Sanctorum ex Albo si quenkum Ecclesia delet,  
Cum tali quenkum vix finit illa loqui;  
Cum miserum Satanæ tradendum iudicet, illi  
Nemo potest *salve* dicere, nemo *Vale*:  
A templo absentes *solido* dum mulctat, avaro  
Auri sacra fames imperat esse pio.  
Hinc inducta chorum fanatica turba frequentat,  
Cui saltem in *nummis* *Caesar* amatus erit;  
Maxima & hæc templum tibi, *Rustice*, causa viden-  
Nè facias agrum, quem colis ipse, Deum. (di,  
Qui sua lethifero transfixit pectora ferro,  
Denegat huic *solitum*, Judicis urna, *rogum*.  
Sub Cruce sortitur, damnatus lege, sepulchrum,  
Hic tamen alterius vi perit, ille suâ.  
Collaudent alii Romanâ morte peremptum,  
Sic Cato succubuit, sed caruit Tumulo.

*Non datur in terris Pastor Universalis  
totius Ecclesiae.*

**Q**uid tibi nobiscum *Rome* nequissime Pastor?  
Unde tuum invadit sceptrum aliena pedum?  
Concessi placidas quid transis *Tyberis* undas?  
Linqis & *Italia* pinguis prata tuæ?  
Dic agè quid nostris tua vult praesentia terris?  
Amisissas nunquid *Tytere* quæris oves?  
Ad possessa venis, praereptaque pascua serus,  
Alterius frustra Dux cupis esse gregis;  
Stat *Carolo* jurata fides, justissima lex est  
Qui caput hoc renuit, perdat ut ille suum.  
Unde tibi supra socios data tanta potestas?  
Qui Rex est, Regem *Maxime* non habeat.  
Ex quo Pastorem te depulit *Anglia*, felix  
Terra suis caruit, templaque nostra lupis.  
Non tondes, verum ceu Mercenarius esses,  
Deglubis miserum dilacerasque gregem;  
Impiger hinc nostras oras velut alter *Iason*  
Appetis, ut tecum vellera fulva feras.  
Quid cupis ambitiose quibus non sufficis unus?  
Cum desint vires ad tua vota pares;  
Vis dici Pastor *Generalis*? perderis ipso,  
Papa licet fueris *MAXIMUS* in titulo,  
Sors tua mortalis, non est mortale quod optas,  
Conveniens summo Vox erit illa Deo,  
Tu tamen affectas *Christus*, Scelerate, videri,  
Illius in terris quod geris ipse vicem,  
In terris geris ipse vicem; concedimus ultro,  
Nam quocunque loco sis, ibi *Christus* abest.

Julii 6. 1663. In vespertijs Comitiorum, Respond. Rich. Perrinchief,  
pro Gradu Doctorali in Theologia.